

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios. ² Si'cni bacuaa tolsaías, ni gunii xtidx Dios, che räjp Dios:

Bahuii gan, guxhaḷä ni chanä xtidxä,
ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyunsa'c xnezyuj Dad,
colslüi rexnezyulajzni.”

⁴ Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajczeni, te jia xtojḷreni.

⁵ Riädcuadiajg xhidajḷ reni rbäjz Judea, näjza reni rbäjz guedx Jerusalén. Dxejcti cheni ruxhobdojḷreni lo Dios, rustiobnis Juanreni neḷ gueu Jordán.

⁶ Xhajb Juan nacchee con guichlajd cameii, xsindoorni nacchee con guiid, niluxh gudajwni guxha't näjza dzun-bäserguijxh. ⁷ Caguluiini rebejḷ, räpgajcni:

—Detzä siääd tej nani sajcro loä, nani nicla di nungäjḷ surloä, cuää xcura'chni. ⁸ Narä abatiobnisä la'tu con nis, biädla laani guxhaḷni Sprit Dxan xten Dios te cuääzni neḷ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neḷ redxejga, birii Jesús guedx Nasare't ni yu' Galilee. Dxejcro batiobnis Juan Jesús neḷ gueu Jordán.

¹⁰ Che birii Jesús neḷ nis, bahuiini bixal guibaa. siädyäjt

Sprit Dxan xten Dios yejcni si'c te palom. ¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

Bateed be_{nd}xab prueb Jesús

(Mt. 4:1-11; Lc. 4:1-13)

¹² Sas baxha_l Sprit Dxan xten Dios Jesús lo reyubidz.

¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil be_{nd}xab nani rnibee, nani laa Satanás, xho niujnni te nusoob Jesús xtiidxni. Dxejcru biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan ne_n latzguiib. Dxejcti huij Jesús nez Galilee, huiluiini xtidx Dios. ¹⁵ Dxejc räjp Jesús:

—Abidzuj_n dxej, luxh yälrnibee xten Dios abidzuj_n gajxh. Col_siejch lajztu, col_lchalilajz xtidx Dios.

Gurejdx Jesús tajp be_{jn} ni rniaaz bäjl

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuini lo Simón näjza loj Andrés bejtz Simón. Cazälreni xqui_jxhreni lo nis, sa'csi rniaazreni bäjl. ¹⁷ Dxejc räjp Jesús lojreni:

—Col_tanajl narä, te gunä cuedxtu be_{jn} lacuaa ni guiniaaztu bäjl.

¹⁸ Lagajc dxejc basa'nreni rexqui_jxhreni, sanätirenini.

¹⁹ Dxejc gusaj Jesús sche'n, sas bahuini loj Jacoob näj Juan, rexi'n Zebedeo. Cayunsa'creni xqui_jxhreni ne_n xcanuureni. ²⁰ Guredxgajcni guiro'preni, dxejcti laareni basa'nreni xtadreni Zebedeo ne_n canuu, näjza rexmosni, sanätirenini Jesús.

Te bejn nani guyu' beṇdxab neṇ lastooni
(Lc. 4:31-37)

²¹ Bidzujntireni guedx Capernaum. Dxejcru sabd, dxej ni rusilajz rexpē Israel, biu' Jesús neṇ guidobāz xten rexpē Israel. Dxejcti baluii Jesús rebejn ni tre' ro'c.

²² Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. ²³ Neṇ xquidobāzreni yu' te bejn yu' te beṇdxab neṇ lastooni. Beṇdxabga guredxa', rājpnī:

²⁴ —Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beṇdxan ni siäd lo Dios.

²⁵ Dxejcti gudidxa' Jesús lo beṇdxabga, rājpnī lojni:

—Basäuu ro'lu, birii neṇ lastoo niguiire.

²⁶ Sas beṇdxabga batienguij niguiiga, luxh cabedxa'ni biriini neṇ lastoo niguiiga. ²⁷ Bidxejbti guiraareni, canab-diidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeṇdxab, luxh ruzoobreni xtiidxni.

²⁸ Di niacaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹ Che biriireni xquidobāz rexpejn Israel, huinä Jesús Jacob näj Juan roliz Simón näjza Andrés. ³⁰ Luxh xnan suegr Simón naga', yu'ni xliaa. Dxejc rājpreni lo Jesús:

—Cayacxhuuni.

³¹ Dxejcti gubig Jesús lojni, gunaazni ṇaani, guläsnini; lagajc dxejc biriini xliaa. Dxejc gusloj cayunireni.

Xhidajl beṇracxhuu basiajc Jesús che huääz gubijdx

(Mt. 8:16-17; Lc. 4:40-41)

³² Che huääz gubijdx, luxh abiu' guxhijñ, biädnäreni guiraa rebenracxhuu loj Jesús, näjza renani yu' beñdxab neñ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälgujdx. Niluxh gulääzani xhidajl beñdxab, niluxh dini nusaan ninii rebenñdxabga, sa'csi najnreni chu najcni.

Baluu Jesús nez Galilee

(Lc. 4:42-44)

³⁵ Che bara yääl, cäyru bistie Jesús, biriini sääni te laad cadro ruti bejñ. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús. ³⁷ Che bidxälreneni, räjpreni lojni:

—Guiraa rebejñ caguiillu.

³⁸ Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neñ reguidobäz xten rexpejñ Israel. Gu-nibeezani birii rebenñdxab neñ lastoo xhidajl rebejñ.

Basiajc Jesús te bejñ ni ral tiejxhni

(Mt. 8:1-4; Lc. 5:12-16)

⁴⁰ Gubig te benracxhuu ni ral tiejxhni loj Jesús, bazux-hijbni. Dxejcti räjpni lojni:

—Narä nanä sajc gusiajclu narä palga rlanjlu.

⁴¹ Balaslajc Jesús benracxhuuga, gunaazni ñaani, räp-gajcni:

—Rlazä jiajclu. Biajc ñaj.

⁴² Cheni guniini scree, biacgajc benracxhuuga.

⁴³ Dxejcti gulunejz Jesús bejñga. Per räpxgaani lojni:

⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejñ lo Dios si'c te seen, te gacbee rebejñ abiajclu.

⁴⁵ Dxejc säa bejn̄ga. Sas gusloj cayujyni diidx lo rebejn̄ xcuent guiraa nani gujcn̄i. Ni'cni diru niajcdi niu' Jesús nicla tej guejdx. Cansajni te laad cadro ruti bejn̄. Niluxh guiranejz rii rebejn̄, siädhuiireni Jesús.

2

Basiajc Jesús te bejn̄ ni di guniib

(Mt. 9:1-8; Lc. 5:17-26)

¹ Che agudejd balti dxej, biusac Jesús nen̄ guedx Capernaum. Dxejcti biejn̄ diajg rebejn̄ arbäjzni. ² Bidopgajc xhidalduxh bejn̄. Gudxaj nen̄ yu'. Nicla rolä' di niajł nisiujreni. Dxejcti caguluii Jesús xtidx Dios lo rebejn̄. ³ Dxejcti bidzujn̄ tajp bejn̄, nuureni te bejn̄ ni digacti guiniib; siädnärenini lo Jesús. ⁴ Luxh di niajcdi nidzujn̄reni cadro suga' Jesús, sa'csi yu' xhidajł bejn̄ ro'c. Ni'c baxhalreni yejc yu' nejz cadro sujni. Dxejcru cadro baxhalreni basiäjtreni da' ni naga' beñracxhuuga lojni. ⁵ Che bahuii Jesús rililajzreni, dxejc räjpni loj beñrachxhuuga:

—Xi'nä, agubicaj rextojłlu.

⁶ Sas gaii bejn̄ ni ruluii leii ni sobga' ro'c bejnreni xhigab nen̄ lastooreni, naareni: ⁷ “¿Xhicuent rnii niguiire scree? Caniyajni Dios; rut rajcdi rudzucaj dojł. ¡Dioſtis rajc rudzucaj dojł!” ⁸ Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c nen̄ lastootu? ⁹ ¿La guyasiru gäbni loj beñracxhuure: “Agubicaj rextojłlu”, o la gäbni: “Huistie, cua' xta'lu, gusaj”? ¹⁰ Baj naj, te gantu rajc rudzucaj Xi'n Dios, nani gujc Niguii, dojł lo guedxliujre, caniä loj beñracxhuure:

¹¹ —Lojlu rniä, ¡Huistie, cua' xta'lu, huij rolizlu!

¹² Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³ Dxejrcu gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni.

¹⁴ Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebe_{ndojl} ni di chasanäj leii, näjza rexpejn_{pacni}, lo mex. Xhidajlreni tre', luxh sanajlreni Jesús. ¹⁶ Dxejrcu rebejn ni ruluii leii näj re-farisee, che bahuiireni cayaunäjni renani rusquijx näjza rebe_{ndojl}, räjpreni loj rexpejn_{pac} Jesús:

—¿Xhicuent rbenäj xmastrtu reni rusquijx näj rebe_{ndojl}, luxh raunäjnireni, ränäjnireni?

¹⁷ Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebe_{nsa}'c, biädtedxä rebe_{ndojl}, te gusiech lajzreni.

Gunabdiidxreni loj Jesús xcuent yälrucua'n

(Mt. 9:14-17; Lc. 5:33-39)

¹⁸ Cagucua'n rexpejn Juan näj rexpejn re-farisee, renani najc rebe_{nguidoo} loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn re-farisee luxh rexpejn_{paclu} di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon chää cadro ru' yäl_{ruchnaa} che meer suga' bi'n? Che meer suga' bi'n lojreni, direni

gucua'n. ²⁰ Per sidzujn̄ dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'n̄ni luxh rutiäjz̄ni ladyuxga, dxejc xhiroobruni räjs. ²² Rutza rusäl̄di bin ni gajd guilaj neñ̄ guidyux ni abigaa. Sa'csi bin ni gajd guilajga sutiäj̄sni guijdga che guilajni, luxh sinij̄t binga näjza guijdga. Ni'cni nanab gusäl̄ni bincoob neñ̄ guidcoobza.

Batojp rebejn̄ ni rinajl Jesús triuu sabd

(Mt. 12:1-8; Lc. 6:1-5)

²³ Te sabd, dxej ni rusilajz̄ rexpejn̄ Israel, sasaj Jesús nez loj reyuya'n. Sas gusloj rexpejn̄pacni calääd̄x doj lo triuu.

²⁴ Dxejc räjp̄ referisee, renani najc beñ̄guidoo loj gued̄x Israel, loj Jesús:

—Arniä, ¿xhicuent rujn̄ rexpejn̄pac̄lu dzuun ni di guchaag gunni neñ̄ dxej ni rusilajz̄nu, ä?

²⁵ Dxejcti räjp̄ Jesús lojreni:

—¿La gajd̄tu goļ̄ nani bejn̄ toDavid te huält, laani näj resa'ni, ä? Che biääd̄x xhi gauureni, gulaanreni.

²⁶ Biu' David neñ̄ xyu' Dios cheni guyu' toAbiatar loj Dios. Abiatar saj̄cru loj rebixhojz̄ ni guyu' neñ̄ xquidoo rexpejn̄ Israel. Dxejc gudajw̄ toDavid reyät̄xtiil ni dzuub ro'c. Badeedzanini gudajw̄ rebejn̄ ni yunäj̄ni. Luxh rebixhojz̄tis rajc rajw̄ yät̄xtiilga.

²⁷ Räjp̄za Jesús lojreni:

—Dios bejn̄ dxe sabd sa'csi najnni naquiinpac̄ gusilajz̄ bejn̄. Dini niujn̄ sabd te gapda bejn̄ni. ²⁸ Ni'cni narä, Xi'n Dios ni gujc Niguui, näjza sabd rnibeä.

3

Niguui ni nabjdz̄ te ñaani

(Mt. 12:9-14; Lc. 6:6-11)

¹ Biu' Jesús stehuält nen̄ xquidobäz rexpejn̄ Israel. Ro'c yu' te niguii nani nabijdz te ñaani. ² Niluxh ro'c cagula'tz rebejn̄ Jesús don la susiajcn̄i niguiiga sabd, dxej ni rusilajz rexpejn̄ Israel, sa'csi rlajzreni cue'creni xquejni loj nani rnibee rexpen̄ Israel. ³ Dxejc räjp Jesús lo niguii nani nabijdz ñaani:

—Huistie, guzuj galäiire.

⁴ Dxejcti gunabdidxgajcn̄i loj gaii rebejn̄ga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yälñabajn̄, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii ñaalu.

Dxejcti basliini ñaani. Biajctini. ⁶ Dxejcru biunejz refarisee. Guslogajczeni caguchaagreni diidx con reni nadxaag Herodes, te don xho ju'treni Jesús.

Xhidajl bejn̄ bire' ro' nis

⁷ Jesús näjza rexpejn̄pacni sääreni ro' nis, luxh xhidajl ben̄ Galilee birinajlni. ⁸ Che gojnreni redzunro ni rujn Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zarenı birii nejz stelaad gueu Jordán, biriizarenı nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp Jesús loj rexpejn̄pacni quilreni te canuu, te na'c gutää reben̄x-hidaalgani. ¹⁰ Abasiajc Jesús xhidajl ben̄racxhuu, ni'cni guiraasi ben̄racxhuu caxa't lojni, te canrenini te jiajreni. ¹¹ Niluxh che rhuii reben̄dxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreıi chu najcni.

Gule Jesús tzubitiop bejn loj reni rinajl*ni*
(Mt. 10:1-4; Lc. 6:12-16)

¹³ Birii Jesús sääni lo te dajne' cadro gurejdxni renani rlanj*ni* cueni. Gubigtireni loj*ni*. ¹⁴ Dxejcti guleni tzubitio'preni te sanäjreni laani, te guxhalnireni chaluiireni xtidx Dios; ¹⁵ te ga'preni yälrnibee te gusiajcreni benracxhuu, te cuääzaren*ni* rebendxab. ¹⁶ Retzubitio'p bejn ni gule Jesús najc: Simón, ni gulälajzani Pedr. ¹⁷ Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu säloj*ni* bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejb rrigajc, ¹⁹ näj Judas Iscariot, ni bato' Jesús loj reni rdxechlajz loj*ni*. Sä'tireni roliz te dade'.

*Yälrnijaj loj Sprit Dxa*n* xte Dios*
(Mt. 12:22-32; Lc. 11:14-23; 12:10)

²⁰ Dxejc bidopsac rebejnxhidaalga; nicla niaj*c* niaunäj Jesús rexpejn*pac*ni. ²¹ Che biejn diajg resa' Jesús dee, biädxhiirenini, sa'csi naareni, yej*c*ni cayajc.

²² Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebendxab, yu' nen lastoo niguiire. Niluxh nani rnibee rebendxab rudeed yälrnibee lo Jesús te cuääni bendxab.

²³ Dxejc gurejdx Jesús rebejn*ga*, bijyni te cuent ni ruluii lojreni, räjpreni:

—¿Xho gurilaagw bendxab lagajc sabendxabni?
²⁴ Palga rebejn xten te yälrnibee la'reni, luxh tilnäj te cuaani ste cuaaga, di yälrnibeega chu xchej. ²⁵ Palga te famil rdilnäj lagajc sa'ni, di familga chu xchej. ²⁶ Palga bendxab nani rnibee tilnäj lagajc laani, di xcälrnibeeni chu xchej, sa'csi ni'c gun luuxni.

²⁷ 'Rut gacdi jiu' rolijz te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

²⁸ 'Rniliápac lojtu guiraa dojl nájza yälrniyaj xten rebejn sajc jia. ²⁹ Nani guiniyaj Sprit Dxaan xten Dios, digacdi guibicaj rextojlni, anuutisni xtojlni par tejpas.

³⁰ Rájpní si'c sa'csi caniireni yu' beñdxab neñ lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹ Dxejcru bidzujñ xnan Jesús, náj rebetzhuinni. Direni niu', baxhaltisreni chu huitejdxni. ³² Rebejn ni sobga' gabi Jesús rájpreni lojni:

—Xnanlu náj rebejtzlu suga' ro' lä', caguiilreni luj.

³³ Dxejcti rájpní Jesús lojreni:

—¿Chu reni'c najc xnanä náj rebetzä?

³⁴ Bahuigajcni loj renani sobga' gabini, dxejc rájpní lojreni:

—Redee najc xnanä, rebetzä. ³⁵ Chutis ni rujn ni rlanj Dios, ni'c najc betzä, bisianä, nájza xnanä.

4

Xcuent niguii ni sale'c binij

(Mt. 13:1-23; Lc. 8:4-15)

¹ Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis. ² Dxejc baluiinireni guiraloj, ganax cuent ni ruluii guniini. Che caguluiini, rájpní lojreni:

³ —Gucua diajgtu dee. Guyu' te niguii. Biriini sale'cni binij. ⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga neñ guij cadro xheti xhidajl yuj.

Binijga gulengajcni, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubijdx, bigolni, gubijdzitini. ⁷ Stee lajt biajb binijga neñ yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. ⁸ Per stee lajtga biajb binij lo yusa'c. Gulejn reyäjlgá, guroobreni, gucsa'creni. Yu'reni cuaj galbitzúu xob, yu'reni cuaj gayojñ xob, yu'zarení cuaj tegayúu xob.

⁹ Dxejc rájpní lojreni:

—Chutis ní ríajz guisíeed, sucuadíajgní.

¹⁰ Che asii xhidajl bejn, rebejn nani suga' gajxh cadro suganäj Jesús guitzubitio'p xpejnñpacní gunabdiidx lo Jesús xhi säloj cuentre. ¹¹ Dxejc rájpní Jesús:

—Dios abejn gacbeetu te gantu xho najc yälxhiga'tz xten xcälrníbee Dios nani najc xhiga'tz ñajli. Niluxh lo ste'ca bejn con cuenttis rniä guiraa recosre, ¹² te mase cahuiireni direni gumbee, te mase cayiejn diajgreni, direni gacbee. Scree gacní, te na'c gúsiejch lajzreni, te na'c guibicaj xtojñreni.

¹³ Rájpzani lojreni:

—¿La ditú gacbee cuentre? ¿Xhocha gacbeetu xhidajlru cuent? ¹⁴ Niguiire nani sale'c binij najc si'c te nani ruluí xtidx Dios. ¹⁵ Yu' bejn ní najc si'c binij ní biajb cuä' nezyuj: riejn diajgreni xtidx Dios nani ruluí bejn. Dxejc che jiejn diajgreni xtidx Dios, riääd Satanás rbägajcni xtidx Dios ní yu' neñ lastooreni. ¹⁶ Yu'za rebejn ní najc si'c binij ní biajb neñ reguij, renani che jiejn diajgreni xtidx Dios, rbaa lajzreni rca'reni diidxga. ¹⁷ Niluxh direni nisi-udzu'tz, sa'csi guxii huilii lajzreni. Che rdejdréni trabajw o che rusacsí bejnreni xcuent xtidx Dios, rusaanreni xtidx Dios. ¹⁸ Yu'zarení najc si'c binij ní biajb neñ yaguejch, riejn diajgreni xtidx Dios, ¹⁹ dxejc che ru'rurení yärsia' xcuent recos guedxliujre, rsia' lajzreni ga'preni meel,

rlajzreni ga'prureni guiraloj recos, dxejc riu' redee nen lastooreni, rusäuuni lo xtidx Dios, xlia'si biejn diajgreni xtidx Dios. ²⁰ Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzoo xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx
(Lc. 8:16-18)*

²¹ Räjpa Jesús lojreni:

—¿La riädnaü te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä? ²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rlajz guisieed, sucuadiajgni.

²⁴ Räjpa Jesús lojreni:

—Colyunxгаа xhigab rediidx ni riejn diajgtu. Nani rusälü loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yälñajn, lojreni sudeedru Dios yälñajn. Luxh renani xhetru rusälü loj xhigabreni, sudzucaj Dios yälñajn nani rajpreni.

Xcuent binij ni roob

²⁶ Guniiza Jesús lojreni:

—Yälñabee xten Dios najc si'c rsiajc te niguii che rbe'cni binij lo yuj, ²⁷ dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' nen dojga. ²⁹ Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpn.

San Marcos 4:30 13 San Marcos 4:41

Xcuent bedz muxhtas
(Mt. 13:31-32; Lc. 13:18-19)

³⁰ Räjpa Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiniuni? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bāze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpałaani.

Si'c baluii Jesús ganax con cuent
(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. ³⁴ Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

Rusiacdxi Jesús bej nāj nisdoo
(Mt. 8:23-27; Lc. 8:22-25)

³⁵ Lagajc gudxejga rājpn loj rexpejn pacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadro sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, rāpgajczeni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, gudidxa'ni lo bejga, rājpn lo nis:

—Guredxi.

Gulāzgajc bej, biacdxini. ⁴⁰ Rājpn Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, rājpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

5

Nigui Gadara ni yu' bendxab neñ lastooni

(Mt. 8:28-34; Lc. 8:26-39)

¹ Bidzujntireni stelaad ro' nisa, lo yuj xten Gadara. ² Si'ctis ni birii Jesús neñ canuu, biädgajc te niguii lojni ni birii neñ rebiliää cadro rga'tz bengut. Yu' bendxab neñ lastoo niguiiga. ³ Rbäjzni neñ rebiliääga luxh rut rajcdi rucuaduuni, nicla con cadenguuib. ⁴ Xhidajl huält agacbacuaduureni ni', naa niguiiga con cadenguuib, luxh litis batiuugni recadenguuibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxunni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädllu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, bendxab, birii neñ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

¹⁰ Sanuutis canabni lo Jesús na'c guxhalni rebendxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab rebendxabga loj Jesús, räjpreni:

—Baxhal nuure loj recuchre te jiu'nu neñ lastooreni.

¹³ Dxejcti basaan Jesúsreni. Biriiti rebendxabga neñ niguiiga, dxejc biu'reni neñ lastoo recuchga. Yu' si'cti

tiop miĵ cuch ro'c. Baxun̄ recuchga, dxejc birol̄reni ro' guilaj, bitejbreni neñ nis, gujttireni neñ nisga.

¹⁴ Renani cayajp recuchga baxun̄reni, huiyeiireni diidxga neñ guejdx, näjza loniaa. Dxejc biääd bejn̄ biädhuii nani gujc ro'c. ¹⁵ Che bidzujn̄reni cadre suga' Jesús, bahuiireni loj niguii nani guyu' rebendxabga neñ lastooni. Sobga'ni ro'c, najcwni xhajn̄ni luxh nasa'c yejcni. Niguiire najc nani guyu' bendxab ni laa Legión neñ lastooni. Bidxejbt̄i rebejn̄ nani bahuii lojni. ¹⁶ Dxejcr̄u rebejn̄ ni bahuii xhi gujc ro', huiyeiireni diidx xho guzajc niguiire nani guyu' bendxab nenni galoo, näjza nani guzajc recuch. ¹⁷ Dxejc gusloj canabreni loj Jesús jiunejz̄ni.

¹⁸ Che biu' Jesús neñ canuu, niguii nani guyu' bendxab neñ lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij roliz̄lu, lo resa'lu. Huiyei diidx lojreni xho bennäj Dadlu, näjza xho balaslajz̄ni luj.

²⁰ Sä'ti niguiiga, gusloj cayujyni diidx neñ reguejdx xten Decápolis xho bennäj Jesúsni. Guiraa rebejn̄ bidxeloj.

Xindxa'p Jairo näjza gunaa ni bahual̄ xhajn̄ Jesús

(Mt. 9:18-26; Lc. 8:40-56)

²¹ Che bidzunsac Jesús stelaad ro' nisga neñ canuu, bidzujn̄ xhidalduxh bejn̄ cadre suga'ni. Bia'nti Jesús ro' nisga. ²² Dxejcr̄u biääd te niguii nani laa Jairo, ni rnibee neñ xquidobáz rexpen̄ Israel. Che bahuiini loj Jesús, bazuxhijbni lojni. ²³ Canabpacni lojni, räjpni:

—Xindxapä'ä acayejt. Gudaa, guzujlu ñaalu yejcni, te jiaj̄cni, te guibaj̄ni.

²⁴ Sanäti Jesús bejn̄ga. Xhidajl bejn̄ sanajlni, luxh cagutäärenini. ²⁵ Loj reben̄xhidaalga yu' te gunaa ni agujc tzubitiop iyz racxhuuni yälguidxbäii. ²⁶ Agudedduxhni trabajw, abahuii xhidajl doctoorni. Xlia'si abanij̄t̄ni

guiraa nani rajpni, luxh xhet racnäjdini, alga rxuuruni. ²⁷ Sa'csi biejn diajgni xhini'c canii rebejn̄ xcuent Jesús, gu-big gunaaga nez dejtz Jesús, guideb neñ̄ rebejn̄, bahualni xhajt Jesús. ²⁸ Cayujñni xhigab, naani: “Palga narä falä xhajtisni, siacä.” ²⁹ Lagajc dxejc guläjz caxe' xtiejñni, gucbeeza tiejxhni abirii xcälracxhuuni. ³⁰ Gucbegajc Jesús yu' chu abasiajčni. Gubiregajčni neñ̄ reben̄xhidaalga, räjpni:

—¿Chuni'c bahual̄ xhabä?

³¹ Dxejcru räjp rexpejn̄pacni lojni:

—Rhuiilu ben̄xhidaal cagutäálu, luxh naalu: “¿Chuni'c bahual̄ xhabä?”

³² Sas cahuii Jesús nez ree, nez rec, te fiini loj nani bahualni. ³³ Dxejc bidxejb gunaare, racejsni, sa'csi gucbeeni xhini'c gujčni. Dxejc biädni, bazuxhijbni loj Jesús, räbliini loj Jesús guira'ti ni bejñni. ³⁴ Dxejc räjp Jesús lojni:

—Xindxä'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

³⁵ Canisijc Jesús si'c che bidzujñ̄ renani birii rolijz dade' ni rnibee neñ̄ xquidobäz rexpejn̄ Israel. Räjpreni:

—Agujt xindxape'lu. ¿Xhicuent rusieedrulu Dad mastr?

³⁶ Dxejc che biejn diajg Jesús nani caniiireni, räjpni lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pedrtis näj Jacoob näjza Juan bejtzni. ³⁸ Che bidzujñ̄ni rolijz dade'ga, bahuii Jesús biey ni cayujñ̄ rebejn̄ ni rbedxa' roon. ³⁹ Biu'tini räjpni:

—¿Xhicuent rujntu si'c? Gajd dxape're guet. Na-gayejssini.

⁴⁰ Alga baxhiznäjrenini. Dxejc gunibee Jesús birii guiraa rebejn̄ga. Dxejcti huināni xcuzajn dxape'ga con renani sanāni. Biu'reni cadro naga' dxape're. ⁴¹ Gunaazni n̄aa dxape'ga, dxejc rājpn̄i:

—Talita cumi —nani sāloj con xtiidxnu: Dxape', lojlu rniā, huistie.

⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn̄ ni bahuii gulās Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't (Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanāzani rex-pejn̄pacni. ² Che bidzujn̄ sabd, dxej nani rusilajz rexpejn̄ Israel, gusloj caguluiini nen̄ xquidobāz rexpejn̄ Israel. Bidxeloj xhidajl bejn̄ nani biejn̄ diajg rextiidxni, rājpreni:

—¿Caro bisieed niguiire guiraa recosre? ¿Xhi yālnajnre cua'ni ni'c rajc rujnni rextzunduxh Dios con n̄aani? ³ ¿La xhet laadi carpinteer, xi'n Marii, bejtz Jacoob, nāj José, nāj Judas, nājza Simón dee, ä? ¿La xhet reedi rbājz rebisianhuinni?

Luxh bidxechlajzreni lojni. ⁴ Dxejc rājpn̄ Jesús lojreni:

—Catis rināljazreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rināljazdini.

⁵ Luxh di niajcdi niujn Jesús xhidajl milaagwr ro'c. Tiopchontis benracxhuu basiajcn̄i, bazujni n̄aani yejceni.

⁶ Bidxelo Jesús sa'csi di lajzreni nilii. Caguluiitini nen̄ guiraa reguejdx'e' ni ria'n gajxh nejzga.

Baxhal Jesús tzubitio'p bejn ni rinajlni chaluiireni xtidx Dios

(Mt. 10:5-15; Lc. 9:1-6)

⁷ Dxej cru gurejdxni guitzubitio'p xpejn pacni. Gusloj caguxhalni tiopgajreni; badeedzani yälrnibee lojreni te guinibeereni loj rebendxab. ⁸ Gunibeeni xhet chanädi- reni lo nejz, ganaxhtis te yajg te sanäjreni. Di nungäjlni chanäreni nicla bisuud, nicla yätxtiil, niclaza meel nen dobdäjlni. ⁹ Nungäjlni xcaj gura'ch ni'reni, nägajc ga'preni tejtis gamangw, xhet tio'pdini. ¹⁰ Dxejcti räjpni lojreni:

—Cadrotis jiu'tu nen te guejdx, coljia'n nen tejtis yu' guiraa redxej ni chutu guejdxga. ¹¹ Palga yu' te guejdx cadro direni gusaan jiu'tu luxh di rlanjreni cuadiajgreni diidx ni sanätu, colrii guejdxga, colcuibj guxhuj ni'tu si'c te seen te gacbeereni xhet laadi bejnreni. Rniliápac lojtu, guxiiru trabajw ted reben Sodoma näj reben Gomorra quela rebejn ni yu' guejdx cadro direni gusaan jiu'tu.

¹² Dxejc biriireni, sääreni. Cayäbgajc reni nanabpac gusiejch lajz rebejn. ¹³ Gulääzaren i xhidajl bendxab dxejcti gudääbreni se't yejc xhidajl benracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

¹⁵ Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcnı, luxh ııaj agubansacni loj rebengut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcälınasa'c Herodías. Herodías gujc chääł Lib, bejtz Herodes, dx-
ejc cua' Herodes gunaaga si'c chääłni. ¹⁸ Räjı Juan loj Herodes:

—Xhet laadi rbäznäjlu chääł bejtzlu.

¹⁹ Ni'cni rdxechlajz Herodías loj Juan, luxh rlajzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni beıısa'c, beııdxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuađiagsa'cni xtiıdxni. ²¹ Niluxh guyu' xmood Herodías. Che gojł laj Herodes, bayaanni rexpeljıni ni rnibee, näjza rebejı nani sajz nez región Galilee. ²² Dxejcti biu' xındxa'p Herodías cadro cayajwreni, baya'ni nez lojreni. Bidzaglazduxh Herodes näjza rexpıoozni baya' gunaaga, xındxa'p Herodías. Dxejc räjı Herodes lo gunaaga:

—Gunab ni rlajztıslu loä, narä sunıdxäni.

²³ Dxejcru räplii Herodes lojni:

—Sunıdxä xhıtıs ni guınıablu. Mase gala' yuj ni rnıbeä.

²⁴ Biriıtini nen yu', huiye'tzni loj xnanni, räjıni:

—¿Xhini'c guınıabä lojni?

Dxejc räjı xnanni lojni:

—Gunab yejc Juan ni rutiobnis lojni.

²⁵ Huıgajcni loj reii, sas gunabni lojni, räjıni:

—Rlazä gunıdxgajclu loä yejc Juan ni rutiobnis. Nen te pla't baniıdx yejcnı.

²⁶ Dxejcti guc-huınduxh lajz Herodes, sa'csi abadeedni xtiıdxni lojni, luxh sa'csi abıejn diajg renani sobganäjni lo xmexni, ni'c dipac rlajzni nudxoıjnni nani gunab gunaaga

lojni. ²⁷ Baxhalgajc reii te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen latzguiib, biädnätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejn̄pac Juan si'c, biädläsreni togoolga. Dxejcti bacua'tzrenini nen te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni näjza ni baluiireni. ³¹ Dxejc räjp Jesús lojreni:

—Coltaa, xtebnu choñnu cadro rut rbäjzdi, guisilaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni. ³² Dxejcti sääreni nen te canuu cadro rut rbäjzdi. ³³ Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujn̄reni loj Jesús näjza rexpejn̄pacni, dxejcti bidojpreni lojni. ³⁴ Birii Jesús nen canuu, bahuiini loj benxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl gudxej, gubig rexpejn̄pacni lojni, räjpreni:

—Rut rbäjzdi ree, luxh agudxej naj. ³⁶ Baxhal rebejn te chääreni lo reguejdx, näjza rerench, te chasiireni yätxtiil gauureni sa'csi xheti xhi gauureni ree.

³⁷ Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebenxhidajlre?

³⁸ Dxejcti räjp Jesús lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, näjza tiop bäjl.

³⁹ Dxejcru gunibee Jesús räjpreni loj guiraa rebejn:

—Colcuej xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga näjza guiro'p bäjlga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bäjl, badeednini loj rexpejn_{pacni} te badeedrenini loj guiraa reben_{xhidaalga}. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm guidxadoo yätxtiil näjza bäjl ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejn_{pacni} neñ canuu, chäga-jcreni Betsaida, ni tre' dejtz nis stelaad, lałni cagusadi-idxn_i rebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijn, yu' rexpejn_{pacni} neñ canuu galäii nis lał ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlanjni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te benmalni, ni'c guredxa'reni. ⁵⁰ Guiraareni bahuiireni lojni, bidxebduxh_{reni}. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdx_i bej, luxh laareni bidxeloduxh_{reni}, ⁵² sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

*Basiajc Jesús rebenracxhuu neṅ guedx Genesare't
(Mt. 14:34-36)*

⁵³ Gudejdreni lo nis, bidzujṅreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni neṅ canuu, biembegajc rebejṅ Jesús, ⁵⁵ dxejcti birii rebejṅ guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. ⁵⁶ Niluxh cadrotis rij Jesús, neṅ reguedxbáz, neṅ reguedxro, nájza loj reṅrench, rguixhreni rebenracxhuu cadre rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajṅ xhajb Jesús.

7

*Nani runijt lastoo bejṅ
(Mt. 15:1-20)*

¹ Dxejcti refarisee, renani najc beṅguidoo loj guedx Israel, nájza gaii rebejṅ ni ruluii leii, renani birii Jerusalén, bidojṅreni loj Jesús. ² Bahuiireni cayajw gaii rexpejṅpac Jesús, luxh canii rebejṅ nacdxuudx naareni (dee säloj direni quiib ṅaareni si'ctis ni rdiib ṅaa rebeṅ lajdxreni). Ni'cni guniyajreni rexpejṅpac Jesús. ³ (Guiraa rebejṅ xten Israel, nájza refarisee, sasanäj nani baluii rebeṅgool ni yu' guedx Israelreni. Direni gauu palga direni quiib ṅaareni balti huält. ⁴ Che rbi'reni rijreni lo guii, rguibsa'creni ṅaareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjrrureni, luxh yu' mood rguuibreni rextrastreni nájza rexplooreni, nájza rextrast-guiibreni, nájza rexloonreni.) ⁵ Dxejc gunabdiidx refarisee nájza rebejṅ ni ruluii leii loj Jesús, räjpreni:

—¿Xhicuent di rexpejṅpacu gun si'cni baluii rebeṅgool, niluxh rajwreni guideb nacdxuudx ṅaareni?

⁶ Dxejcti gunii Jesús lojreni räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guiitz:

Guejdxre sanälajz narä con rextiidxni,
niluxh lastooreni zistro suga' loä.

⁷ Xlia'si ruzuxhijbreni, sa'csi direni chanälajz narä.

Ruluiireni si'c xtiidxpac Dios nani rnii rebejn.

⁸ Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rexrasttu, luxh rujnzatu xhidajlru cos sa' redee.

⁹ Räjpxa Jesús lojreni:

—Rusa'ntu xtidx Dios te risanäjtu recostumbr xtentu.

¹⁰ Sa'csi räjpx Moisés: “Huinälajz xtadlu con xnanlu.”

Räjpxani: “Suju'tpactu nani gudzubde yejc xtadni o yejc xnanni.” ¹¹ Niluxh la'tu rniitu sajc gäb bejn loj xtadni

o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). ¹² La'tu ditu gusaan gunru bejn por xtadni nicla por xnanni. ¹³ Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc räjpxni loj guiraareni:

—Colcuadiajg, colyabee xtidxä. ¹⁵ Rexhicos yälrajw ni rajw bejn, dini gunijt bejnğa, rediidx ni rii nen lastoo bejn, näjza recos ni rujn bejn, ni'c runijt bejnğa. ¹⁶ Pal yu' chu rlanjz guisieed, sucuadiajgni.

¹⁷ Dxejcti gula'reni loj rebenxhidaal, biu'reni nen yu'. Dxejc gunabdiidx rexpejnpacni loj Jesús xhi säloj cuent ni guniini. ¹⁸ Basejc Jesús diidx lojreni, räjpxni:

—¿La näjza la'tu xheti xcäriejntu? ¿La di'tu gabee xhitis yälrajw nani riu' nen bejn digacdi gunijtni lastoo bejn, ä? ¹⁹ Sa'csi dini jiu' nen lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰ Dxejc räjpni:

—Rediidx ni rii neñ lastoo bejn, näjza recos ni rujn bejn, ni'c sii runijt lastoo bejn. ²¹ Sa'csi neñ lastoo rebejn rii rexhigabguijdx, näjza yälresnäjä chääl sa'ni, yälresnäjä ni xhet najcdi chäälni, yälrugut sa'ni, ²² yälgubaan, yälrlajzni ga'pni xhixhten bejn, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälñayechlajzni, yälguyalajz. ²³ Guiraa reyällatsiajre neñ lastoo bejn riireni, luxh reni'csi runijt bejn.

*Tej guna Sirofenicia ni bililajz xtidx Jesús
(Mt. 15:21-28)*

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni ni-acbee rebejn caro yu'ni, niluxh di niajcdi niuxhiga'tztisni. ²⁵ Biengajc diajg te gunaa ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús. ²⁶ Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Näjza rebäcua' ni suga' neñ mex rajw nani rtejb ro' rebiuux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii beñdxab neñ lastoo xindxape'lu.

³⁰ Luxh che bidzujñ gunaare rolijzni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

Basiajç Jesús te beñgop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biädnabreni lo Jesús nusujni naani yejc niguiiga. ³³ Dxejcti badzucajnini loj rebejn. Baquitzgajcni rebicuenaani nen diajgni, dxejcru batiobxhejn*ni*, gudajntini lujdxni. ³⁴ Bahuiini xhaguibaa, bazaa lajz*ni*, dxejc räjp*ni*:

—¡Efata! —nani säloj bixal.

³⁵ Dxejcru bixalgajc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjp*ni* lojreni si'c, laareni batie'chrureni diidxga. ³⁷ Rdxeloduxh*reni*, räjp*reni*:

—Guira'ti laaca ruj*ni*; ruxhalni diajg rediagcua't, luxh rusniini regop.

8

Bayaan Jesús tajp mil bejn

(Mt. 15:32-39)

¹ Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejnpacni ni rinajl*ni*, räjp*ni* lojreni:

² —Rulazlazä rebejn*re*, sa'csi naj rajc chon dxej tre'reni loä, luxh xhet yu'di gauureni. ³ Niluxh palga guxhaläreni rolizreni, xliajzreni, sidxajgreni lo nejz; sa'csi yu' renani zijtru siädreni.

⁴ Dxejcru räjp rexpejnpacni loj*ni*:

—¿Caro chaca'nu yätxtiil te cha xque' rebejn*re* ree, cadro rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjp*reni*:

—Gajdztisni.

⁶ Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn_{npacni} te guteedrenini loj rebenxhidaal. Bateedtireni yätxtiilga lo rebenxhidaalga. ⁷ Rajpzareni gaii bälbáz, dxejcti badedsac Jesús xquixhtios lo Dios, gunibeeni bateedzareni rebälbázre loj rebenxhidaalga. ⁸ Dxejc gudajwreni, gudxaj xque'reni. Dxejc batojp rexpejn_{pac} Jesús gajdz dxijm reyätxtiil näj rebäjł dxuc ni bia'n. ⁹ Niluxh renani guda-jwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpejn_{pacni} neñ canuu, biädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biäd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rłajz rebejn ni nabajn naj fii gac resenro xten Dios? Rniliápac lojtu, di rebejn ni nabajn naj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädi-reni. Tejtis yätxtiil nuuren neñ canuu. ¹⁵ Cagulijdx Jesús rexpejn_{pacni}, räjpni lojreni:

—Col_{susin}, col_{nati} levaduur xten refarisee, col_{natiza} levaduur xten Herodes. (Nalajznu, xtiidxreni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdту fii, la gajdту gacbee? ¿La lałtis nacnajd lastootu? ¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che guła'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpreni lojni:

—Tzubitio'pni.

²⁰ —Che guła'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdту gacbesa'c xhi benä?

Basiajc Jesús te lotiä'p Betsaida

²² Bidzunñäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnğa. ²³ Dxejc gunaazni naa lotiä'pga, guläänini neñ guejdx. Che batiobxhejn ni neñ rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

²⁴ Luxh che bahuii bejnğa räjpni:

—Rhuiä sasaj rebejn, luxh si'c yajg rhuiä lojreni.

²⁵ Basusac Jesús naani yejc rebaloj bejnğa. Dxejc bejn Jesús bahuii bejnğa. Biajctini, zijtru gujc bahuisa'cni lo guiraa rebejn. ²⁶ Dxejcti baxhal Jesúsni rolizjni, räjpni:

—Basquejn, huijga rolizlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

*Basule' Pedr Jesús najc Crist**(Mt. 16:13-20; Lc. 9:18-21)*

²⁷ Birinäj Jesús rexpejn̄pacni lo reguejdx ni ria'n nez Cesarea xten Filipo. Lałni sasajreni lo nejz räj̄p Jesús loj rexpejn̄pacni:

—¿Chuni'c rnii rebejn̄ nacä narä?

²⁸ Sas räj̄preni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn̄ ni gunii xtidx Dios.

²⁹ Dxejc räj̄pni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räj̄pni lojni:

—Luj najclu Crist.

³⁰ Dxejcti räj̄p Jesús lojreni:

—Rutlojdi gäbtu chu nacä.

*Gunii Jesús xho guetni**(Mt. 16:21-28; Lc. 9:22-27)*

³¹ Dxejcti gusloj Jesús caguluiini rexpejn̄pacni, räj̄pni:

—Narä nacä Xi'n Dios, ni gujc Niguui. Nanabpac tedä trabajwdxh. Sibälaz rebeṅgool ni najc guxhtis neṅ guedx Israel narä, nājza renani rnibee loj rebixhojz, nājza rebejn̄ ni ruluii leii: sugu'treni narä, luxh ni riojn̄ dxej guibaṅsacä lo rebeṅgut.

³² Guyasi guniini rediidxre. Sas huinä Pedr Jesús telaad, dxejc räj̄pni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejn̄pacni. Dxejc gudiln̄ājni Pedr räj̄pni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebeṅxhidaal con reni najc xpejn̄pacni, räj̄pni lojreni:

—Palga yu' chu rlanj gac xpenäpac, sucuääz gunni ni rsia' lajni gunni, sutedni trabajw si'c tej ni caj lo cruju, sujiädnajni narä. ³⁵ Sa'csi nani rlanj gusläa xcäl'nabajñni, sunijtni xcäl'nabajñni. Luxh nani runijt xcäl'nabajñni xcäl'nasa'c narä, xcäl'nasa'c xtidxä, siliaapac xcäl'nabajñni. ³⁶ Xlia' ga'p bejn guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn te guibannäjni Dios. ³⁸ Nani guituinäj narä con rextidxä naj, cheni najc rebejn bendojl, narä, Xi'n Dios nani gujc Niguui, situinäázani che jiädnaá reangl xten Dios che jiälää lo xcälrdimbicha' Xtadä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl'rnibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacob, näjza Juan, laatisreni huiinäni yejc te danro. Ro'c gubixhlojni garenca lojreni. ³ Gusloj rdimbicha' rexhajnbi, gujc xhajnbi nolbäj. Rut rajcti rusquijtz lajd lo guedxliujre si'c biquijtz xhajnbi. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhreni. ⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibaŋxgaasi Xi'n Dios nani gujc Niguii lo rebengut. ¹⁰ Basälcheereni rediidxre neŋ lastooreni. Dxejcu canabdiidx lo sa'reni xhicha säloj guibaŋsacni lo rebengut. ¹¹ Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiädxgaa Elías?

¹² Dxejcti bazejcti diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtzc xcuent Xi'n Dios ni gujc Niguii, sidejcti trabajwduxh, rutza jjudini? ¹³ Luxh narä rniä lojtu, abiääd Elías, luxh bennäjrenini si'ctis ni rlanjreni, si'cpac ni caj loj guijtzc ni rusule' xcuentni.

*Basiajc Jesús te biuux ni guyu' benđxab neŋ lastooni
(Mt. 17:14-21; Lc. 9:37-43)*

¹⁴ Che asiäädreni cadro tre' sgaii rexpejŋpac Jesús, bahuiireni loj xhidalro bejŋ ni tre' lojreni, luxh cayeinäj rebejŋ ni ruluii leiireni. ¹⁵ Che bahuii guiraa rebejŋ loj Jesús, bidxeloduxhreni, baxuŋreni, huiye'tzreni xchan lojni. ¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beŋxhidaalga, räjpni:

—Dad, ree siädnaá xi'nä lojlu, yu' beŋđxab neŋ lastooni, nani rujn najcni gop. ¹⁸ Cheni rniaaznini, ru-tienta'ni xi'nä, luxh řiduxh bitzuŋ ro'ni, nájza rauya'ni ro'ni, luxh cabijdzni. Aräpä loj rexpejŋpacu cuääreni beŋđxabga, niluxh di niajcti nibäärenini.

¹⁹ Dxejcti gunii Jesús lojreni, räjpni:

—La'tu, bejŋ ni di chalilajz, ¿gucli chu'ä lojtu te chalilajz? ¿Gucli gusieedtu narä? ¿Coltanäni loä!

²⁰ Dxejc biädnäreni biuuxga lojni. Che bahuii beṅdxab lo Jesús, basnijni bi'nga, basälta'tinini lo yuj. Sädiidxni, luxh carii bitzun ro'ni. ²¹ Gunabdiidx Jesús loj xtdadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²² Balti huält rusälṅnini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäṅ nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtda bi'nga, räjpni:

—¡Rililazä! Gucnäṅ narä te chaliiru lazä.

²⁵ Che bahuii Jesús bixa't xhidajl beṅṅ lojni, gudidxa'ni lo beṅdxabga räjpni lojni:

—Beṅdxab ni rujn gop, narä canibeä, birii neṅ lastoo bi'nga. Na'cru chulu neṅ lastooni.

²⁶ Dxejcru guredxa' beṅdxabga, luxh basnibzejsni bi'nga, dxejcru biriini neṅ lastooni. Astoo te beṅgut bia'n bi'nga ro'c. Xhidajl rebeṅṅ räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga. ²⁸ Dxejcti che abiu' Jesús neṅ yu', gunabdiidx rexeṅṅpacni lojni:

—¿Xhicuent di niajcdi nibäänu beṅdxabga?

²⁹ Dxejc räjp Jesús lojreni:

—Di gacdi cuäätu sa' beṅdxabre palga ditu cuedx-guinab lo Dios, palga ditu gucuanxgaa.

Gunisac Jesús xho guetni

(Mt. 17:22-23; Lc. 9:43-45)

³⁰ Dxejc biriireni ro'c, gudejdreni Galilee. Luxh di rlajz Jesús niacbee rebeṅṅ sadejdreni nejzga, ³¹ sa'csi caguluiini

rexpejn̄pacni. Cayäjpni lojreni: “Xi'n Dios ni gujc Niguii sidejdni ladzṅaa rebejn̄, niluxh sugu'trenini. Che guiza' choṅ dxej gujt̄ni, sibajṅni stehuält.” ³² Niluxh laareni direni niacbee xhini'c guniini, bidxejzareni niniabdi-idxreni lojni.

¿Chuni'c sajcr̄u?

(Mt. 18:1-5; Lc. 9:46-48)

³³ Bidzujṅt̄ireni Capernaum. Che biu'ni neṅ yu' räjpni lojreni:

—¿Xhini'c cagusiejyt̄u lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c sajcr̄u lojreni. ³⁵ Sas gurej Jesús, dxejc gurejdxni guitzubitio'p xpejn̄pacni, räjpni lojreni:

—Palga yu' chu r̄lajz gasajcr̄u lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbäz, huinänini galäiireni. Dxejc gudääz̄ni biuxbäzga, räjpni lojreni:

³⁷ —Chutis ni gacnäj te rebix̄e're sa'csi rinälajz̄ni narä, sacnäj̄ni narä, luxh nani gacnäj narä, xhet narätis gacnäj̄tini, nājza xtadä nani baxhaḷ narä racnäj̄ni.

Nani di guiniyaj̄ nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn̄ ni rbää beṅdxab con xcäl̄rnibee lajlu, niluxh dini sanäj̄ nuunu. Sas huiye'tznu lojni na'c gunni si'c sa'csi dini sanäj̄ nuunu.

³⁹ Dxejc räjp̄ Jesús lojni:

—Na'c gudxoṅtu gunni si'c sa'csi bejn̄ nani ruj̄n milagwr con xcäl̄rnibee laä digacdi guiniyagaj̄cni narä.

⁴⁰ Nani di guidxagdiḹ nuunu, xladnu yu'ni. ⁴¹ Rniliáp̄ac lojtu, chutis ni guniidx̄ te bas nis lojtu sa'csi najct̄u xpejn̄pac Crist, siguij̄x Diosni xcuent nani bejn̄ni.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä neñ dojl, sugal te guimolin yejnni dxejcti gucuaarenini lo nisdoo.

⁴³ Palga tej ñaalu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ñaalu gusälreni luj gabijl, loj bajl ni di jiuii, ⁴⁴ cadre diza xpisiujgreni guet, diza bajl jiuii. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadre yu' Dios quela sojb guiro'p ni'lu luxh chäälu gabijl, lo bajl ni di jiuii, ⁴⁶ cadre di xpisiujgreni guet, diza bajl jiuii.

⁴⁷ Luxh palga tej balojlu gun gunlu dojl, gulääni: hueenru chäälu cadre rnibee Dios natiä'p lojlu quela sojb guiro'p balojlu chäälu gabijl, ⁴⁸ cadre di xpisiujgreni guet, diza bajl jiuii.

⁴⁹ 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. ⁵⁰ Hueen najc sejd, luxh palga agudejd yälñadzij yejcnì, ¿xho guntu te gacsacni nadzij? Coļyajc nadzij la'tu, colguibannäsa'c sa'tu.

10

Baluu Jesús xcuent rälruro'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluiinireni si'ctis ni ruluiinireni.

² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

³ Dxejc laani bazejcnì diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitz gusaan cháälni che guro'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej beṅ guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznäjni cháälni. ⁸ Niluxh renani gujc tiop beṅ sajcreni si'c tejsi beṅ”, dirureni gac tiop beṅ, si'c tejsi beṅ gacreni. ⁹ Na'c gudzucaj beṅ lo sa beṅni nani abachaag Dios lo sa'ni.

¹⁰ Che biu'reni neṅ yu' gunabdidxsac rexpeṅpacni lojni xcuent rediidxre. ¹¹ Dxejc räjpni lojreni:

—Chutis niguii ni gusaan cháälni, sas guchṅaani ste'cani, rujnni dojl. ¹² Niluxh palga gunaa guro'n cháälni sas guchṅaani ste'ca niguii, rujnzani dojl.

*Gunab Jesús gunle' Dios yejc rebiuxbáz
(Mt. 19:13-15; Lc. 18:15-17)*

¹³ Biädñäza rebeṅ biuxbáz lojni te gutzuub Jesús ṅaani yejcreni, sas gudidxa' rexpeṅpacni lojreni. ¹⁴ Che bahuii Jesús xhi cayujn rexpeṅpacni, bidxe'chni räjpni lojreni:

—Coṣsaan jiäd rebiuxbáz loä. Na'c gudxoṅtureni, sa'csi xcälrnibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlanj jiu' lo xcälrnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

¹⁶ Dxejcti gudääz Jesús rebiuxbáz, bazujzani ṅaani yejcreni, gunab Jesús gunle' Dios yejcreni.

*Te bi'n ni rapduxh guninäj Jesús
(Mt. 19:16-30; Lc. 18:18-30)*

¹⁷ Che birii Jesús loj xnejzni, ruxun te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beṅsa'c, ¿xhini'c gunä te xca'ä yälṅabajṅ par tejpas?

¹⁸ Sas räjp Jesús lojni:

—¿Xhicuent rniilu loä beṅsa'c? Tejtisni najc beṅsa'c; Diostis najc beṅsa'c. ¹⁹ Najnlu xhini'c gunibee Dios gunni: “Na'c guesnäjlü chääl sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejṅ nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexpejṅpacni:

—Naganduxh jiu' rebejṅ nani yu'duxh xhixtenni lo xcälṅrniabee Dios.

²⁴ Dxejc bidxelo rexpejṅpacni che biejn diajgreni rextiidxni. Dxejc räjp Jesús lojreni stehuält:

—¡Aiiitu xi'näl!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejṅ ni yuduxh xhixtenni guinibee Diosni.

²⁶ Dxejc bidxeloduxhreni, räjpreni lojni:

—¿Chuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi gus_laa sabejn_ni, Diostis rajc rus_laa bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajl_nu luj.

²⁹ Dxejc räjp Jesús:

—Rniliäpac lojtu, chutis nani cuälaz rolizni, rebejtzni, rebisiajn_ni, xtadni, xnanni, chääl_ni, rexi'_nn_i, rexyuj_ni, xcäl_nasa'c narä, näjza xcäl_nasa'c xtid_x Dios, ³⁰ sica'ni lo guedxliujre te gayuu huält xhidajlru. Sica'ni rolizni, rebejtzni, rebisiajn_ni, xnanni, rexi'_nn_i, rexyuj_ni. Sisiuna-jlrenini naj, dxejc xhaguibaa sica'ni yäl_nabaj_n par tejpas.

³¹ Xhidajl rebejn nani saj_c lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejn_npacni sääreni Jerusalén, luxh cadxelojreni. Cadxejbza rebejn nani sana-jlreni. Dxejcti guläsac Jesús rexpejn_npacni lo rebejn, gusloj cayäjp_ni lojreni guira'ti nani sacni. ³³ Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladz_naa rebixhojz nani rnibee näjza rebejn ni ruluii leii. Luxh sinibeereni guetä. Suteedreni narä lo rebenzajt nani digac xpejn Israel. ³⁴ Suxhisnäjreni narä, siguijnreni narä, sutiobxhejnzareni loä, dxejcru sugu'treni narä. Che riojn dxej sibansacä.

Gunab Jacob näjza Juan te yäl_nasa'c

(Mt. 20:20-28)

³⁵ Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlanjtu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbäjgw che acanibeelu.

³⁸ Dxejc räjƿ Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjƿ Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. ⁴⁰ Te cue tejtu ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacoob näjza loj Juan. ⁴² Sas gurejdx Jesúsreni, räjƿni lojreni:

—La'tu najntu renani rnibee lo rebejn nani digac xpejn Israel, rdxaglaz gasajcrueni lo rebejn. Luxh rebejn ni sajc rnibeduxhreni lo rebejn. ⁴³ Xhet si'cni guntu la'tu. Chutis nani rlanj gasajcru lojtu, riäjł gacni mos lojtu.

⁴⁴ Luxh chutis la'tu nani rlanj gasajcru, riäjł gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcälñabajñni te laa xhidajł bejn lo dojł.

Basajc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejnƿacni näjza rebeñxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabäani gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjƿni:

—Jesús, xi'n David, balazlaz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga. Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas roĵca xhablajzni gudixhni, huisuliini, biäädtni lo Jesús. ⁵¹ Dxejc räjp Jesús lojni:

—Naja', ĵxhini'c rlajzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejj.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujnreni gajxh Jerusalén, gudejdreni neñ reguedx Betfagé näjza neñ guedx Betania nez cuä' dajne' ni laa dan Oliib. Baxhal Jesús tiop xpejnĵpacni, ² räjpni lojreni:

—Colĵhäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejnĵ cuibni. Colĵhečni, colĵtanägajcni. ³ Palga yu' chu naa lojtu: “ĵXhicuent rujntu si'c?” Colĵye'tztis: “Dad caquiinni.” Dxejc suxhalĵgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejnĵ ni tre' ro'c räjp lojreni:

—ĵXhicuent caguxhectuni?

⁶ Dxejc räjpreni loj rebejnĵga si'cni räjp Jesús lojreni gäbreni. Basangajc rebejnĵga sanäreni bure'ga. ⁷ Dxejcru

biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga. ⁸ Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siäd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejnpacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni
(Mt. 21:18-19)*

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.
Biejnza diajg rexpejnpacni.

*Gulää Jesús renani ruto' näj renani rsii nen guidoo
(Mt. 21:12-17; Lc. 19:45-48; Jn. 2:13-22)*

¹⁵ Dxejcti bidzujnreni guedx Jerusalén. Biu' Jesús nen guidoro. Gusloj cabäani renani ruto' näj renani rsii nen guidooga. Niluxh batiejxhni rexmex renani ruchaa meel, näjza reyagxhil xten renani ruto' paloom. ¹⁶ Diruni nusaan nidednäjreni xhicos nez nen guidooga. ¹⁷ Dxejc caguluiinireni, räpgajcni lojreni:

—¿La et screedi caj loj guijtz? “Xyu'ä sirilaj yu' cadre rrinab guiraa rebenguedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxelox rextidx Jesús. ¹⁹ Che biu' guxhijñ, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcnì, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliápac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rrinäjtuni, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajztu, colsiäjlza lajztu, te näjza Xtadtu nani yu' xhaguibaa gusiäjlza rextojl̄tu. ²⁶ Palga ditu gusiäjl lajztu con resa'tu, diza Xtadtu nani yu' xhaguibaa gusiäjl̄ lajzni rextojl̄tu.

Yälrnibee xten Jesús

(Mt. 21:23-27; Lc. 20:1-8)

²⁷ Sas bidzunsacreni guedx Jerusalén. La_l ni sasaj Jesús nen̄ guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. ²⁸ Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. ³⁰ ¿Chu baxhal Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?” ³² Diza niacti niäjbreni “rebejn” sa'csi rdx-
ejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

12

Te xcuent rebenguijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni rului, räjpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadro jiä't uubga. Dxejcti bejnii te yu' jiaa, te ro'c cue nani ga'p lo xyujni.

² Badedlaatinini loj gaii bejn, sä'tini zijt. Che bidzujn xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäjł xca' bejnğa. ³ Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni. ⁴ Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. ⁵ Dxejc baxhal bejnğa stee mos, dxejc bagu'trenini. Baxhalni xhidajlrureni. Gaii gudilguijdxreni, sgaiini bagu'treni.

⁶ Yu'za tejtis xi'nni, luxh sanälajznini. Por lult näjza xi'nni baxhalni, naani: “Siucareni xi'nä.” ⁷ Dxejc rebejn nani rbäzlaa ro'c räjp loj sa'reni: “Dee najc laa ni

jiannäj ree. Col̄taa, guigu'tnuni, te xca'nu yujre.”⁸ Sas gunaazrenini, bagu'trenini. Guläätirenini lo yujga.

⁹ ¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdtu gol̄ guijt̄z ni rnii scree?

Guij nani guläcaj renani runchee yu', ni'c agujc mastr ni guzuj galoo.

¹¹ Dad xtenu bejn scree, cos sacduxhni nezlojnu.

¹² Dxejc rlajz reguxhtis nani bacuadiajg cuentre nini-aaz Jesús, sa'csi gucbeereni laareni cacuaa Jesús didxre. Sa'csi bidxeljbre ni rebenxhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhal̄reni gaii xpejn̄ refarisee näjza gaii xpejn̄ Herodes loj Jesús te gula'tzreni don xho gac guini-aazreni Jesús. ¹⁴ Dxejcti biädreni, räjpreni lojni:

—Dad, nadonnu luj najclu te bejn̄ ni rnili. Par luj guiraasi bejn̄ sajc tebloj, sa'csi dilu fii la sajc bejn̄ o la xhet sajcdi bejn̄. Luj ruluiipaclu xhini'c rlajz Dios gun bejn̄. ¿La laaca quiix bejn̄ reimpuest lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdidxreni. Räjpni lojreni:

—¿Xhicuent runnäjt̄u narä scree? Col̄tanä te meelga loä, te fiä lojni.

¹⁶ Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷ Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

Yäl̄rniabdiidx xcuent yäl̄rbaṅsacni lo rebengut
(Mt. 22:23-33; Lc. 20:27-40)

¹⁸ Sas biädhuii resaducee loj Jesús. Resaducee najc rebejn̄ nani rni di rebengut guibaṅsac. Dxejc gunabdiidxreni lojni, räjpreni:

¹⁹ —Dad, xleii Moisés ruluii loonu, palga guet te niguii luxh gusa'n̄ni chäälni ruti xi'n̄ni, nanabpac xca' bejtzni chäälni, te chu xi'n̄ni con laani lacua niu' xi'n̄n tobejtzni. ²⁰ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'n̄ni. ²¹ Dxejcti cua' ni rojpga gunaaga. Che gujtni, rut gajcdi xi'n̄ni. Si'cza gusajc ni riojn̄ga. ²² Si'cza guläznäj gunaaga guigajdzreni. Per nicla tej reni di xi'n̄reni niu'. Dxejcti gujtzta gunaaga. ²³ Guigajdzreni guläznäjreni gunaare. Cheni guibaṅsacreni lo rebengut, ¿chu chääln̄ gacni?

²⁴ Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yäl̄rnibee xten Dios. ²⁵ Che guibaṅsacreni loj rebengut, direni guchṅaa, rutza gudeedtireni te guchṅaaren̄ni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbaṅsac rebengut, ¿la di lajztu guisaj bil̄tu guijtz ni bacuaa Moisés? Moisés bacuaa nani gunii Dios lojni nen̄ bajl, räjpni: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejn̄re, direni gac bengut, nabannäjreni Dios. Et laadi najc xhigabtu.

Yäl̄rnibee ni sajcr̄u
(Mt. 22:34-40)

²⁸ Dxejcro bidzujn tej rebejn ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcro lo guiraareni?

²⁹ Dxejc räjp Jesús lojni:

—Mandamient nani sajcro loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcälñadiplajzlu.” ³¹ Sigajcza najc mandamient ni rojpga: “Huinälajz sabejnlu si'ctis sanälajzlu lagajc luj.” Redee najc remandamient nani sajcro loj guiraareni.

³² Dxejcti räjp bejnga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcälñadiplajzni, luxh chanälajzni resabejnni sigajc laani. Redee sajcro loj ni rujn bejn che rudeedreni gojn lo Dios.

³⁴ Che bahuii Jesús laaca guniini, räjpni lojni:

—Guxii cayäädx te jiu'lu loj xcälñabee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús nejn guidoro, räjpni:

—¿Xho mood rnii rebejn ni najn leii Crist najc xi'n David? ³⁶ Sprit Dxan xten Dios basnii David che bacuaani: Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii
(Mt. 23:1-36; Lc. 11:37-54; 20:45-47)

³⁸ La_lni caguseedni rebejn, räjpni lojreni:

—Co_ssusi_n, na'c gu'chtu loj rebejn ni ruluii leii. Laareni r_lajz sanäj reladsiool xtenreni. Rdxag_lajzreni rnii bejn lojreni nez lo reguii. ³⁹ R_lajzzareni cuereni cadre rbej renani saj_cru ne_n reguidoo näjza cadre ru' relanij. ⁴⁰ Rudzuc_{aj}zareni xhixten rebiiud, rniizareni xhidalduxh diidx che ro_lreni le', te rusäuureni loj rebejn. Castigwroru gac redee.

Gojn xten te biud prob
(Lc. 21:1-4)

⁴¹ Dxejcti gurej Jesús cuä' caj cadre rusäl bejn gojn. Cahuiini cagusäl rebejn meel ne_n cajga. Xhidajl reni rajp cagusäl xhidajl meel nenga. ⁴² Che biäd te biud prob, basäl_lni tiop melbäs ni saj_c si'cti tej centaab. ⁴³ Dxej_cru gurejdx Jesús rexpejn_{pac}ni, räjpni lojreni:

—Rniliápac lojtu, biud proobre basäl xhidajlru lo guiraa renani basäl ne_n cajre, ⁴⁴ sa'csi guiraareni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

13

Gunii Jesús sibijl guidoo
(Mt. 24:1-2; Lc. 21:5-6)

¹ Cheni sariireni ne_n guidoro, räjp tej rexpejn_{pac}ni lojni:

—Dad, bahuii lacti reguij, lacti reyu'.

² Dxejcti räjp Jesús lojni:

—¿La rhuiilu loj reyu're? Nicla tej guij diija'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Olib, cahuiini nez ro' guidooga. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuiinu te gacbeenu asiäddzũgajxh soob guiraa rediidxre?

⁵ Dxejcti gusloj gunii Jesús lojreni, räjpni:

—Colhuii, te rut gusgueedi la'tu, ⁶ sa'csi xhidalduxh bejn̄ jiääd con laä, gäbreni: “Narä nacä Crist”, luxh rniisireni si'c, susguezareni xhidajl bejn̄.

⁷ 'Che jiejn diajgtu yu' guer̄ näj yälnadxeeb xten guer, na'c guidxejbtu. Nanabpac gacni; et dxejcti nitloj guedxliuj. ⁸ Säjs naciõn̄ yejc sanacionni, näj yälrnibee yejc sayälrnibeeni. Xhidajl lajt sajç xu, siliaanza bejn̄, luxh säjs rebejn̄ yejc sa'ni. Redee najc ni guisloj guidxejb, gachuinza lajzni.

⁹ 'Dxejc la'tu col̄susin̄ sa'csi sutedreni la'tu ladznaa reguxhtis, siguijnzareni la'tu neñ̄ reguidoo. Sacrejdxtu lo regubieer näjza loj rereii xcäl̄nasa'c narä, te si'c gac guiniitu xtidxä lojreni. ¹⁰ Nanabpac guirechxgaa xtidx Dios loj guiraa rebejn̄ guedxliuj. ¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jiäjtis yejcti dxejc, sa'csi xhet la'ditu ni guinii, Sprit Dxañ xten Dios ni guinii. ¹² Luxh suto' bejn̄ lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga. ¹³ Sidxechlajz guiraa rebejn̄ lojtu sa'csi najctu xpenä; nani ted guiraa retrabajwre, ni'c gudeed Dios xcäl̄nabajnni.

¹⁴ 'Che fiitu loj nani najc yälr̄dxechlajz, nani najc yälr̄unitloj, nani gunii Daniel ni gunii xtidx Dios. Che fiitu nani suga' cadro di nunyäj̄l̄ suuni, dxejcti suguxun̄

renani yu' nez Judea chääreni nez nen redajn. (Nani gol guijtze sugabeenini.) ¹⁵ Bejn nani suga' yejc yu' na'c jiajtni jiu'ni nen te yu' xca'ni gaii xhixtenni. ¹⁶ Nani yu' loj niaa, di gal jiajt te xca'ni xhablajzni. ¹⁷ ;Aii! Xhiza nalas chu regunaa ni nuu báz, luxh renani rusiä' xi'nni, nen redxejga. ¹⁸ Colnab loj Dios na'c sactu scree nen rebäinajl. ¹⁹ Nen redxejga su' trabajwdxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejn ni nani aguleni.

²¹ 'Dxejc palga yu' chu naa lojtu: “Colhuii, aree Crist”, o “Colhuiire, ani suga' rec”, na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjreni gusgueelireni renani agule Dios. ²³ Ni'cni la'tu colsusin; agunixgaä lojtu guira'ti ni gac.

Xho gac che jiaäd Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴ 'Nen redxejga, cheni luux retrabajwdxhga, sicäy lo gubijdx, luxh diru bäi gusanij. ²⁵ Sitejb rebalxhaguibaa, sinibsejs recos nani nasnä rebalxhaguibaa. ²⁶ Dxejcti suhuii rebejn loä, Xi'n Dios nani gujc Niguii, siälä nen reza guideb yälrnibeduxh xtenä, näjza xcäldimbicha'ä. ²⁷ Dxejcti guxhalgacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

²⁸ 'Colguisieed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäi gusgij asadzungajxh. ²⁹ Sigajcza, che fiitu acayajc recosre, sacbeetu asiädgaxhä, ameer guidzunä. ³⁰ Rniliäpac lojtu,

rebejn ni nabajn dxejc, direni nitloj, fixgaareni gac recosga. ³¹ Sinitloj guibaa najza guedxliuj, rextidxä di nitloj.

³² 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³ 'Colhui, col̄susiñ, col̄nab loj Dios, sa'csi ditu gan guc guidzujñ redxejga. ³⁴ Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susiñ nani canäj rolä'. ³⁵ Si'cza col̄susiñ, sa'csi ditu gan guc jiääd baxhwaan yu'ga, la jiäädni gudxej, o la jiäädni garol yääl, o la cäy, o la jiäädni rsil. ³⁶ Col̄susiñ, te di guiga'tu nagayejstu che guidzujñni. ³⁷ Rediidx nani rniä lojtu, loj guiraa rebejn rniäni: col̄susiñ.

14

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

¹ Riäädx tiop dxej guidzujñ lanij, dxej ni ruzaa lajzreni gulaareni ladzñaa reEgipto. Neñ redxejga rajwreni yätx-tiil nani di saguij. Rebixhojz nani rnibee neñ guidoo xten rexpejn Israel näj rebejn ni rului leii rlaizreni niniaazreni Jesús con yälrusguee, te nugu'trenini. ² Dxejcti räjpreni lo sa'reni:

—Na'c jiennu scree neñ redxelanij, te na'c gun benguejdx biey.

Te gunaa ni basäl se't yejc Jesús Betania

(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu' guejch ni rañ tiejxhni. Che sobga'ni lo mex, biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälñi se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? ⁵ Paru nido' se'tga, nijni si'cti choṅ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxoijntu nani cayujn gunaare? Cos sacduxh dee bennäjni narä. ⁷ Guideb ni guibajntu, su' rebejn nani xhet rajpdi lojtu, luxh che rlanjtu sajc gacnäjtoreni. Narä et xchejdi chu'ä lojtu. ⁸ Gunaare abejnni nani gujctis bejn. Abaslanexhxgaani tiexhä, te chää tiexhä neṅ baa. ⁹ Rniliápac lojtu, cadrotis guidzujntidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlajz Judas guto' Jesús

(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejnpac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguiil Judas xho guto'ni Jesús.

Gudauxchej Dad con rexpejnpacni

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladzṅaa reEgipto. Räjprexpejnpacni loj Jesús:

—¿Caro rlanjzlu chosucheenu te gauulu nadxej, dxe-lanij?

¹³ Dxejc baxhalni tiop rexpejnpacni, räjpni lojreni:

—Colchäj neṅ guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejnpacni nadxej,

dxelaniŷ?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexgaa neñni. Coļyujn xhi guidauunu ro'c.

¹⁶ Sas huij rexpejn̄pacni, bidzujn̄reni neñ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelaniŷ.

¹⁷ Che huääz gubijdx, bidzun̄näj Jesús guitzubitio'p xpejn̄pacni. ¹⁸ Lałni sobga'reni lo mex cayajwreni, räjp Jesús lojreni:

—Rniliápac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpni lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lałni cayajwreni, cua' Jesús yätxtiil, badeedzani xquixhtiooz loj Dios dxejc guļa'nini, badeednini lojreni. Dxejcti räjpni:

—Coļca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga. ²⁴ Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn̄. ²⁵ Rniliápac lojtu, diruna yä'ä bin nani riı yejc uub, dxejli yä'äni stehuält loj xcäl̄rnibee Dios.

*Gunii Jesús sinii Pedr dini gumbeeni
(Mt. 26:30-35; Lc. 22:31-34; Jn. 13:36-38)*

²⁶ Che gulujx bilreni te dij xten Dios, biriireni, sääreni nez dajne' ni laa dan Oliib. ²⁷ Dxejcru räjp Jesús lojreni:

—Guiraatu sibälaztu narä naguxhijñ, sa'csi si'c cajni lo guijtz: “Sugu'tä baxhtoor luxh suxuñ rexiil.” ²⁸ Che guibañsacä loj rebengut, ganidä cha'a Galilee, dxejcti jiaädtu.

²⁹ Dxejc räjp Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliápac lojlu, lagajc guxhijñre, nicla gajd guidgaii cuedxa' tiop huält, luj aguiniilu choñ huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejñpacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujñreni te lajt cadre laa Getsemaní. Dxejc räjpni loj rexpejñpacni:

—Colcuej ree lañni chanabä lo Dios.

³³ Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh.

³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtadä, luj rajc rujnlu guira'ti: badzucay retra-bajwre loä. Xhet si'cni rlazädi narä, bejn si'cni rlazzlu luj.

³⁷ Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? ³⁸ Coltie'ch bacal, colnab lo Dios, te na'c

guntu dojl. Lastootu rlanj gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. ⁴² Colchastie, colcho'. Asiäddzungajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejnpacni, siädni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluu leii, näjza rebengool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilguijdxni xmos bixhojz nani sajrcu, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejnpacni gulälazrenini, baxuntireni.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵² Dxejcti baxunni, libasa'nni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädnäreni Jesús loj bixhojz ni sajcro. Bidojp rebixhojz nani rnibee, näj rebengool ni najc guxhtis, näjza rebejn ni ruluii leii. ⁵⁴ Luxh Pedr zijt zijt sanajlni Jesús. Che bidzujntini lo xle' bixhojz ni sajcro, gurenäjni rebejn nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebengool ni najc guxhtis, caguilreni xhi tej xquej Jesús nidxälreni, te nugu'treni Jesús, xhet bidxäldireni. ⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con naa rebejn, luxh chontis dxej guncheä steeni, ni nac-chee et con naadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcro galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuutis ro'ni, xhet guniidini. Dxejcti gunabdidxsac bixhojz ni sajcro lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajnbn, räjpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basäu-ureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biääd te xcriaad bixhojz ni sajcru. ⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beñ Galileelu, luxh guyasi riejn rniilu si'c rnii reben Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

⁷²Dxejcti barojp huält guredxa' guidgaa. Dxejc banalajz Pedr nani räjp Jesús lojni: “Che gajdli guidgaa cuedxa' tiop huält, luj gacla choḅ huält aräjplu dilu gumbee narä.” Dxejc guslojni cayoonni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badee-drenini loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelaniypac ruslaa Pila't tej rebejn ni yu' latzguiib. Ruslaani chutis te ni rniab rebejn. ⁷ Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnä j gubieer. ⁸ Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. ⁹ Dxejc gunabdiidx Pila't lojreni, räjpni:

—¿La rlanjtu guslaá reii xten rexpejn Israel, ä?

¹⁰ Sa'csi gucbegajcni rdxechlajz rebixhojz loj Jesús, ni'c bateedreneni lojni. ¹¹ Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlanjtu gunnäá nani rniitu reii xten rexpejn Israel?

¹³ Dxejcru guredxa'reni:

—¡Bacuaani lo cruzj!

¹⁴ Dxejc räjp Pila't lojreni:

—¿Xhini'c xhet laati bejnini?

Dxejcti laareni rbedxa'rureni:

—¡Bacuaani lo cruzj!

¹⁵ Baslaati Pila't Barrabás, sa'csi rlanjz ni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

¹⁶ Dxejc huiinä rexsoldaadni Jesús neñ Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷ Dxejcti bashuajcwreni Jesús te lad moraad, bencheereni te coron guejch basälreni yejcní. ¹⁸ Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

¹⁹ Batiäjlreni te yabixhijl yejcní, batiobxhejnreni lojni, luxh guzuxhijbreni te rajnrenini. ²⁰ Che gulujx basac-síreni Jesús, gulääreni lad moraad ni najcwni, sas bashuajcwrenini xhajbpacni. Gulägajczeni Jesús te cuaarenini lo cruzj.

Bacuaareni Jesús loj cruzj

(Mt. 27:32-44; Lc. 23:26-43; Jn. 19:17-27)

²¹ Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruzj Jesús.

²² Dxejcti huinäreni Jesús cadro laa Gólgota, nani säloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴ Che gulujxti bacuaareni Jesús loj cruzj, gudzujtreni yejc rexhajnbi, te don xhini'c xca' teygareni.

²⁵ Agujc choñ or gulejn gubijdx che bacuaareni Jesús lo cruzj. ²⁶ Letreer cadro bacuaareni xtojlni scree bejnrenini: “Reii xten rexpejn Israel.” ²⁷ Bacuaazareni lo stiop cruzj tiop gubaan, tejni xladbee Jesús, xtee xladbäjgwni. ²⁸ Dxejc guzobj diidx ni caj loj guijtjz nani rnii: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusiibreni yejcreni, räjpreni lojni:

—Jaa! Luj nutiejxhlu guidoo luxh choñtis dxej niunchesacluni. ³⁰ Naj baslaa lagajc luj, biäjt loj cruzjzga.

³¹ Näjza rebixhojz ni rnibee, näj rebejn ni ruluui leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. ³² Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyajzareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojl läidxej, bicäy si'cti choñ or. ³⁴ Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxej cru basäl̄nini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

³⁷ Dxej cru guredxaduxh Jesús, gujttini. ³⁸ Dxejc lajd ni najl neñ guidoro biräjsni, gujcni tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee biri-najl regunaare Jesús, luxh bahuiirenini. Yu'za xhidajlru regunaa ni biädnajl Jesús che biädni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejñ Israel. ⁴³ Biäd José ni siäd Arimatea, najcni te rebejñ ni sajç loj reguxhtis. Näjza laani cabäjnzi xcäl̄rnibee Dios. Guideb yäl̄nabajñ gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitángä lojni agujt Jesús, dxejc badeed Pila't tiexh Jesús loj José. ⁴⁶ Agusii José te bariaad, luxh che gulätñi Jesús lo cruzj, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxej cru batzugni te guiro ro' biliääga. ⁴⁷ Bahuii Marii Magdalen näj Marii xnan José cadre biga'tz Jesús.

16

Huájz Jesús loj rebengut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israel, Marii Magdalen náj Marii xnan Jacob nájza Salomee gusii setnejxh te chatääbreni se'tga tiexh Jesús. ² Che biu' xmaan, rsilooru, che calejn gubijdx, biädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaaj guijga, luxh najcni te guiroduxh. ⁵ Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga. ⁶ Dxejcti räjp bi'nga lojreni:

—Na'c guidxejbtu. Caguilto Jesús ni siäd Nazare't, nani cuaj lo cruz. Rutiruni ree. Agubajñni lo rebengut, coltahuii cadre gudixhreni tiejxhni. ⁷ Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

⁸ Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

Baluiloj Jesús loj Marii Magdalen

(Jn. 20:11-18)

⁹ Gubajñ Jesús loj rebengut rsilooru che biu' xmaan. Baluilojni galoo loj Marii Magdalen, nani agacgulääni gajdz bendxab neñ lastooni. ¹⁰ Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

Baluiloj Jesús loj tiop xpejñpacni

(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

Baxha Jesús repost

(Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. ¹⁵ Räj p Jesús lojreni:

—Colchäj guideb lo guedxliuj, colnii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtne lo dojl. ¹⁷ Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdi-reni; susujreni naareni yejc rebenracxhuu luxh siajc rebenracxhuu.

Huä'p Jesús xhaguibaa

(Lc. 24:50-53)

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnne milagwr te gucbee bejn laapac xtidx Dios ni caniireni. Sugacni si'c.

Xtidxcoob Dios ni biändä dad Jesucrist **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
